

DOMINGU V TEMPU KUAREZMA – TINAN B

Tema

Iha liturjia Domingu V Kuarezma nian, nalian ho insisténsia, Maromak nia preokupasaun atu hatudu ba ema dalan salvasaun nian no vida definitiva nian. Maromak nia Liafuan garante ita katak salvasaun liuhusi moris ida ne'ebé rona ho atensaun Maromak nia projetu sira no iha doasaun/saran an totál ba maluk sira.

Iha *leitura dahuluk*, Jahwéh apresenta ba Israel proposta ida Aliansa foun nian. Aliansa ne'e implika katak Maromak muda Povu nia fuan, basá ho fuan ida ne'ebé nakfilak de'it mak ema iha kapasidade atu hanoin, deside no atua tuir Maromak nia proposta sira.

Leitura daruak apresenta mai ita Jezús Kristu, amlulik-boot Aliansa foun nian, ne'ebé solidariza An ho ema sira no hatudu dalan salvasaun nian. Dalan ne'e (Jezús rasik nia dalan) hala'o hodi moris iha diálogu ho Maromak, iha deskoberta ninia dezafiu no proposta sira, iha obediénsia radikál ba ninia projetu sira.

Evanjellu konvida ita atu hateke ba Jezús, atu aprende ho Nia, atu tuir Nia iha dalan domin radikál nian, iha don moris nian, iha saran an totál ba Maromak no maluk sira. Dalan krús nian, iha mundu nia matan, mak dalan ida frakasu no mate nian; maibé husi dalan domin no doasaun ne'e mak suli mai moris loos no rohan-laek ne'ebé Maromak hakarak oferese mai ita.

LEITURA I – Jer 31, 31-34

Jeremias, profeta moris iha Anatot iha + tinan 650 mK, hala'o ninia misaun profétika husi 627/626 mK, no to'o tempu Babilónia harahun Jerusalém (586 mK). Profeta hala'o nia misaun iha reinu Judá (liuliu iha sidade Jerusalém).

Faze dahuluk Jeremias nia pregasaun nian abranje parte Josias nia ukun. Liurai ne'e ho ninia preokupasaun atu defende identidade polítika no relijioza Maromak nia Povu nian, lori reforma relijioza hodi halakon maromak falsu rai-li'ur nian. Jeremias nia mensajen, iha período ne'e, haktuir nu'udar apelu ba konversaun, ba fidelidade ba Jahwéh no ba aliansa.

Iha tinan 609 mK, Josias mate iha kombate hasoru Ejitu. Joaquim mak troka nia. Faze daruak atividade profétika Jeremias nian abranje tempu Joaquim (609-597 mK) nia ukun.

Joaquim nia ukun mak tempu desgrasa no salan nian ba Povu, no tempu inkomprensaun no terus nian ba Jeremias. Iha faze ne'e, profeta mosu hodi kritika injustisa sosiál sira (ne'ebé dalaruma liurai mak halo) infidelidade relijioza (halo aliansa polítika ho kbiiit rai-li'ur no la konfia iha Maromak). Jeremias konvensidu katak Judá hakat liu sasukat hotu no invazaun husi Babilónia nian hakbesik daudaun ne'ebé sei kastiga Maromak nia Povu nia salan sira. Ne'e mak buat ne'ebé nia hateten ba makhorik sira Jerusalém nian... Jeremias nia previzaun sira konkretiza iha tinan 597 mK: Nabucodonosor invade Judá no deporta ba Babilónia parte ida populasauun Jerusalém nian.

Iha tronu Judá nian, Sedecias (597-586 mK) mak tuur. Faze datoluk misaun profétika Jeremias nian hala'o iha período ukun ne'e nian. Liutiha tinan ruma submisaun hakmatek nian ba Babilónia, Sedecias koko fali polítika tuan aliansa nian ho Ejitu. Jeremias la konkorda

atu tau laran-metin iha kbiit estranjeiru liufali Jahwéh... Maibé liurai no boot sira la fó atensaun ba profeta nia opiniaun.

Iha 587 mK, Nabucodonosor tau serku hale'u Jerusalém; tropa Ejitu nian mai tulun Judá no Babilónia nia tropa sira retina serku. Iha momentu ksolok boot nasional nian, Jeremias fó sai katak Babilónia sei mai fali serku no harahun Jerusalém (kf. Jer 32,2-5). Hetan akuzasaun traisaun nian, sira hatama profeta Jeremias iha kadeia (kf. Jer 37,11-16) no hetan perigu lakon nia moris (kf. Jer 38,11-13). Enkuantu Jeremias kontinua haklaken atu Judá rende, Nabucodonosor foti Jerusalém, harahun sidade no deporta ninia populasan ba Babilónia (586 mK).

Ita la bele dehan ho seguransa kontestu iha-ne'ebé mosu mensajen testu ohin nian.

Ba komentador ruma, nia mak liafuan ne'ebé fó sai iha faze dahuluk atividade profética Jeremias nian (Josias nia ukun) no dirije ba israelita sira Reinu Norte nian. Mensajen ne'e mak mensajen ida esperansa nian, atu anima povu ne'ebé ba tinan atus ida ona lakon independénsia no hela iha Assíria nia domínio nia okos.

Ba seluk fali, testu ne'e husi Sedecias nia tempu, entre deportasaun ba Babilónia dahuluk no daruak nia klaran (597-586 mK). Iha época ida-ne'e mak Jeremias deskobre perspetiva teolójika foun no hahú refleto kona-ba tempu foun iha-ne'ebé Maromak sei ofereba ba nia Povu: hotu tiha katástrofe/susar, sei posivel hahú filafali buat hotu, basá Maromak hakarak halo Aliansa foun ho Judá.

MENSAJEN

Maromak dispostu atu hametin Aliansa foun ho nia Povu. Aliansa ida-ne'e sei diferente husi Aliansa Sinai nian.

Aliansa Sinai nian mak Aliansa esterna ida, grava iha fatuk-belak no Povu nunka interioriza loloos. Nia apresenta lei sira ne'ebé Povu tenke kumpra, maibé lei sira ne'e nafatin lei esterna de'it, ne'ebé la atinje Povu nia fuan no la muda ninia maneira moris nian. Tanba ne'e, Maromak nia Povu kontinua tuir dalan infidelidade nian ba Maromak, injustisa nian, autosufisiénsia nian, salan nian. Maromak nia Povu adereba Aliansa Sinai nian, maibé hoibun de'it liufali ho fuan tomak. Nune'e, laho adezaun efetiva ida fuan nian, imposivel mantein fidelidade ba ukun-fuan sira no ba eziyénisa sira Aliansa nian.

Aliansa foun signifika Maromak sei grava nia lei no ukun-fuan sira iha fuan, iha membru ida-idak Maromak nia Povu nia íntimu. Iha antropolojia semita, fuan, aleinde sede ba ema nia sentimentu sira, sede hanoin sira-nian, projetu sira-nian, desizaun no asaun sira-nian; nia mak sentru ema tomak nian, iha-ne'ebé ema halo diálogo ho an rasik, foti nia desizaun sira, asume responsabilidade sira. Tanba ne'e, Maromak nia inisiativa sei fó possibilidade atu membru ida-idak Povu Maromak nian interioriza eziyénsia sira Aliansa nian no prezente iha sede ne'ebé moris hanoin sira, define valór sira, deside asaun sira. Ho "fuan" nakfilak (katak deside no 'atua tuir Maromak nia eskema no lójika sira), fiar-na'in ida-idak bele moris iha fidelidade ba Aliansa, iha obediénsia ba ukun-fuan sira, respeito ba lei sira, iha domin ba Jahwéh. Entaun, Jahwéh sei sai, tebes duni, Israel nia Maromak; Israel sei sai, loos duni, Povu ne'ebé moris tuir Maromak nia proposta sira no fó sasin kona-ba Maromak iha mundu nia klaran.

Ho tipu foun relasan nian ida-ne'e, Jahwéh sei la sai "deskoñesidu" ida ba nia Povu. Entre Maromak no Israel bele estabese relasan pesoál ida prosimidade nian, intimidade nian, familiaridade nian. Komuñan ho Jahwéh la sai lisan ida difisil atu aprende, maibé buat ruma inatu no natural, ne'ebé mosu husi fuan ida iha diálogo permanente ho Maromak.

Iha frase ikus ita-nia testu nian, Maromak haklaken perdaun ba Povu nia falta sira: perdaun total ida no laho rezerva mak rezultadu dahuluk husi relasan foun ne'ebé sei estabese entre Maromak no nia Povu. Iha ne'e mós manifesta Maromak nia "domin rohan-laek".

LEITURA II – Heb 5, 7-9

“Surat ba Ebreu sira” mak hakerek ida (sermaun ida) autór anónimu ida-nian no nia destinatáriu sira mós ita la hatene (títulu “ba ebreu sira” mai husi referénsia barak ba Testamentu Tuan no rituál “sakrifísiu” sira-nian ne’ebé obra ne’e apresenta). Posivel katak nia destinatáriu mak comunidade kristán ne’ebé maioria mai husi judaizmu; maibé ida-ne’e mós la seguru, tanba Testamentu Tuan mak patrimóniu komún ba sarani hotu – mai husi judaizmu nune’e mós sarani sira mai husi paganizmu.

Buat ne’ebé bele dehan mak sarani sira comunidade ne’e nian, moris iha situasaun difisil, iha persegisaun no ambiente ne’ebé sai inimigu ba fiar... Sira mós lakon lalais entuziazmu, lakon fervór tempu uluk nian no monu ba bateur sira doutrina seluk nian ne’ebé la koerente ho fiar simu husi Apóstolu sira... Autór nia objetivu mak estimula moris iha kompromisu sarani no lori fiar-na’in sira atu buras iha fiar. Tanba ne’e, autór esplika mistériu Kristu nian (apresenta liuliu, nu’udar “amlulik” Aliansa Foun nian) no fó hanoín kona-ba Kreda nia fiar tradisionál.

Testu ne’ebé ohin propoin mai ita mak parte ida husi reflesaun naruk ida (kf. Heb 3,1-9,28) kona-ba Kristu nia saserdósiu. Períkopa Heb 5,1-10 dezenvelope tema Krist nu’udar amlulik liuhusi komparaun ho amlulik-boot Testamentu Tuan nian, hodi apresenta aspetu ne’ebé hanesan no kontráriu. Iha autór sermaun ida-ne’e nia perspetiva, amlulik-boot tenkéser ema ne’ebé, liuhusi ninia umanidade no fragilidade, iha kapasidade atu komprende nia maluk sira nia salan (“Nia bele trata didi’ak sira ne’ebé beik no halo salan basá nia rasik mós koko atu sai kbiit laek” – Heb 5,2); nia ofere se sakrifísiu, “ba nia salan rasik, nune’e mós ba povu nia salan”, atu kesi fali komuñau entre Maromak no ema (Heb 5,3); no Maromak bolu nia atu hala’o misaun ida-ne’e, hanesan buat ne’ebé akontese ho amlulik Aaraun (Heb 5,4).

Elementu tolu ne’e ita haree evidente liu iha Kristu, amlulik-boot Aliansa foun nian.

MENSAJEN

Kristu, maski Maromak Oan, moris iha ema nia leet no koko ema nia fragilidade no frakeza. Nia teruss, tanis, koko laran-nakdedar no ta’uk iha mate nia oin, hanesa ema hotu (karik autór ko’alia kona-ba Jezús iha Foho Oliveiras, molok ema kaer nia – kf. Mc 14,36). Tanba ne’e, Jezús mak amlulik-boot, ho kbiit atu komprende ema nia frakeza sira no haraik ba sira ai-moruk.

Jezús nia saserdósiu realiza iha diálogu permanente ho Aman. Nia nafatin buka, liuhusi orasaun intensa, dixerne no kumpre Aman nia hakaran. Iha momentu difisil liu nia moris iha rai, Nia rona Aman, mantein adezaun inkondisionál ba Aman, hatudu ninia disponibilidade totál atu kumpre projetu salvasaun ne’ebé Aman hakarak. Nune’e, Jezús iha orasaun no liuhusi orasaun ne’ebé akompaña nia moris tomak (liuliu iha momentu dramátiku sira nia terus/paixaun no mate), nia konverte nia moris tomak iha karan ida ba Aman, iha “sakrifísiu” doasaun nian ba Aman. Ho ninia obediénsia, Nia hanorin ba ema sira atu moris iha komuñau totál ho Maromak, kumpre Maromak nia projetu sira no hadomi maluk sira to’o don totál moris nian; ho ninia obediénsia, Nia halakon egoizmu no salan ne’ebé hadook ema sira husi Maromak. Nia sai modelu Ema Foun nian tanba ninia komuñau totál ho Aman no ho ema sira, nune’e ba ema hotu ne’ebé rona ninia mensajen no tuir Nia, nia sai “bee-matan salvasaun rohan-laek nian” (vers. 9).

Jezús Kristu, loos duni, mak amlulik-boot Aliansa foun nian. Nia hatene no komprende ema nia fragilidade sira no iha kbiit atu ofere se tulun ne’ebé presiza atu hetan salvasaun. Hodi kumpre ho modu integrál Aman nia projetu, Jezús hatudu ba ema sira katak dalan salvasaun nian mak komuñau ho Maromak, iha obediénsia radikál ba Maromak nia projetu sira no iha don moris nian ba maluk sira. Jezús sai amlulik-boot ne’ebé haraik ho modu efikás salvasaun ba ema sira, hodi lori sira ba hasoru Maromak no moris nakonu.

EVANJELLU – Jo 12, 20-33

Evanjellu situa ita iha Jerusalém, parese iha loron Jezús nia entrada solene iha sidade santa (kf. Jo 12,12-19). Ema lubun-boot “ne’ebé to’o ba Festa” foti Jezús nu’udar liurai/mesias, hodi hatudu ritu ida entronizasaun nian no haklaken Jezús nu’udar “ida-ne’ebé mai hodi Na’i nian naran, liurai Israel nian” (Jo 12,12-13). Tuir João, ema sira foti “ramos” no sai ba hasoru Jezús ho jestu ida liga ho Festa Taka-baluk nian, festa ne’ebé celebra tempu israelita sia moris iha taka-baluk, durante la’o iha rai-fuik, liutiha libertasaun husi Ejitu. Autór Evanjellu Dahaat nian sujere katak, prosesu libertasaun definitiva Maromak nia Povu nian atu to’o ona nia rohan. Nune’e, nia apresenta xave ida leitura nian atu komprende Jezús nia mate ne’ebé besik daudaun ona.

Iha kuadru tama “ema gregu ruma” ne’ebé “sa’e ba Jerusalém atu adora” no hakarak haree Jezús. Iha-ne’e, “ema gregu” signifika, provavelmente, “la’ós judeu”. Bele mós sira mak prosélitu (ema estranjeiru ne’ebé konverte ba judaísmu) eh karik simpatizante judaizmu nian.

“Ema gregu sira” dirije ba Filipe, husi Betsaida, sidade ida hela iha Erodes Filipe nia ukun, katak, la’ós territóriu judeu. “Betsaida” signifika “fatin peska” nian (ne’ebé bele indika dixípulu sira-nia misaun – sai “peskadór ema nian” – Mc 1,17). Filipe bá ko’alia ho André kona-ba ema gregu sira nia pedidu no sira-rua apresenta kazu ne’e ba Jezús.

Istória “ema gregu sira” ne’ebé hakarak “haree Jezús” serve nu’udar pretestu ba João atu halo katekeze furak ida kona-ba saida mak signifika “haree Jezús”.

MENSAJEN

“Ema gregu sira” bá Jerusalém atu “adora” Maromak iha Templu; maibé sira hakarak hasoru malu ho Jezús, koñese Jezús no ninia projetu, iha kontaktu ho salvasaun ne’ebé Nia mai ofere (hakarak “haree Jezús” – vers. 21). Ho ne’e, João sujere katak Templu no kultu antigul la’ós ona fatin iha-ne’ebé ema hasoru Maromak no salvasaun; agora, ema ne’ebé iha interesse atu hetan libertasaun loos tenke dirije ba Jezús rasik. Husi parte seluk, salvasaun/libertasaun ne’ebé Jezús lori mai destina ba ema tomak – maski ema sira ne’e hakat liu fronteira fízika Israel nian (“ema gregu sira”).

“Ema gregu” sira-ne’e la dirije diretamente ba Jezús, maibé ba dixípulu sira. Ida-ne’e hatudu responsabilidade misionária ne’ebé comunidade Jezús nian iha, ho knaar atu lori Jezús ba povu hotu rai nian. Faktu katak Filipe ko’alia uluk ho André no ikusmai mak sira na’in rua bá Jezús, reflète difikuldade ne’ebé comunidade sarani dahuluk sira hetanbainhira halo ain-hakat ba evangelizasaun jentiu sira-nian. Desizaun integra jentiu sira iha Jezús nia comunidade la’ós desizaun individuál, maibé comunidade mak foti desizaun ne’e depoizde konsulta Na’i.

Jezús nia “oras” mak krús. Nia konxiente katak nia sei hetan mate aat liu no Nia konxiente katak ema hotu sei abandona Nia. Maibé, Nia mós konxiente katak iha krús ne’e sei hatudu Mane Makso’ik nia “glória”.

Jezús nia mate mak tutun prosesu ida saran An rasik nian, ne’ebé hahú bainhira “Liafuan halo An ba ema no harii nia taka-baluk iha ema sira nia leet” (Jo 1,14); krús mak hahalok ikus entrega totál nian ba Maromak nia projetu sira, halo ho domin to’o nia konsekuénsia ikus liu. Durante nia moris iha rai, Jezús buka, iha liafuan no jestu ida-idak, halo ema sai livre husi opresaun hotu, haraik ba nia dignidade no moris nakonu. Hodi la hakfodak ho perspetiva mate nian, Nia kumpre to’o rohan projetu libertadór Maromak nian ba ema. Ninia mate mak konsekuénsia ninia konfrontu ho kbiit sira mate nian ne’ebé domina mundu.

Husi parte seluk, hodi fó nia moris tan domin, Jezús husik ba nia dixípulu sira lisaun aas liu no ikus liu ne’ebé sira tenke aprende.

Husi Jezús nia “don” ne’e moris mai humanidade foun ida. Umanidade ida ne’ebé Jezús liberta husi opresaun, husi injustisa, husi mekanizmu sira ne’ebé hamosu terus no ta’uk...

Umanidade ida ne'ebé manán egoíзму no aprende katak ita-nia moris la'ós ba an rasik maibé atu fó, lahó limite, tan de'it domin. Laiha dúvida katak don moris nian fó fuan wain. Nune'e, iha krús, Jezús hatudu Maromak nia projetu libertadór ba ema sira.

Ema ne'ebé hakarak "koñese" Jezús tenke hateke ba "Ema" ida-ne'e; Ema ne'ebé tau nia moris tomak atu serví Maromak nia projetu no mate iha krús atu hanorin ema sira domin lahó limite. Nia tenke aprende lialoos ida-ne'e: ita labele hahoris moris (ba an rasik no ba ema seluk), se la entrega moris rasik. Domin totál de'it mak fekundu no hahoris moris ("Ha'u dehan lialoos ba imi: trigu musan ida monu ba rai la mate karik, nia hela mesak; mnia mate karik, nia fó fuan barak" – vers. 24). Ema ne'ebé hadomi an rasik no taka an iha egoíзму estéril, ema ne'ebé preokupa de'it atu defende ninia interese no perspetiva sira, lakon oportunidade atu to'o ba moris loos, ba salvasaun. Karak an egoísta ba moris rasik lori ba ta'uk atu atua, difikuldade atu kompromete an, silénsiu iha injustisa nia oin – katak moris ida iha ta'uk no opresaun, nune'e la serve atu moris. Maibé, ema ne'ebé livre totál husi ta'uk, ema ne'ebé haluha ninia interese rasik no seguransa sira no kompromete an iha luta ba justisa, ba direitu sira, ba ema nia dignidade no liberdade, ema ne'ebé hadomi maka'as ema seluk to'o saran nia moris ba sira, nia mak fó fuan moris nian no soi moris nakonu, ne'ebé mate mós sei la hamnook. No moris ida-ne'e mak iha sentidu no lori ema ba realizasaun tomak.

Jezús moris dinámika moris nian ida-ne'e, fó nia moris hodi la ta'uk atu enfrenta "mundu" – katak, sistema opresaun no injustisa nian ne'ebé hakarak halo ema atan nafatin liuhusi ta'uk ba mate. Jezús livre husi ta'uk ida-ne'e, tanba ne'e mak nia livre atu hadomi ho an tomak. Ema sira ne'ebé hakarak "haree Jezús" no koñese ninia projetu, Nia propoin dalan hanesan – dalan domin no saran an totál nian. Sai dixípulu katak kolabora ho Jezús iha ema sira nia libertasaun, maski tenke enfrenta opresaun "mundu" nian no enfrenta ninia mate rasik ("ema ruma hakarak serví Ha'u karik, tuir Ha'u mai" – vers. 26a).

Ema ne'ebé aseita proposta ne'e nia sai ida nafatin ho Jezús, tama iha comunidade Maromak nian (vers. 26b). "Mundu" bele despreza nia karik; maibé Maromak sei onra nia no simu nia nu'udar ninia oan (vers. 26c).

Ita-nia testu remata ho "lian husi lalehan" ne'ebé hahí Jezús (vers. 28-32). Ne'e mak forma ida atu hatudu katak Jezús nia dalan iha marka garantia husi Maromak. "Lian husi lalehan" asegura katak forma moris nian ne'ebé Jezús propoin mak forma loos ida no Maromak garante ninia autenticidade. Nune'e Maromak konfirma ba dixípulu sira katak oferese moris tan domin la'ós dalan ida frakasu no mate nian, maibé dalan ida glorifikasaun no moris nian.